

**Вольбы**  
**до органів самосправи сел і вольбы до органів самосправных країв**  
**в році 2022**

## **ІНФОРМАЦІЯ О СПОСОБІ ГОЛОСОВАННЯ**

Воліч може волити лем в селі/місті свого стабільного биваня у тім волебнім раєні, в списку волічів котрого є записаний.

Воліч є повинный по приході до волебной містности превказати волебній комісії свою тотожность тым, же предложить обчаньску легітімацію або документ о перебуваню чужінця.

Волебна комісія прислушного раёну закружкує чісло воліча, під котрым є зарегістрований в списку волічів на вольбы до органів самосправных країв і выдасть волічови порожню белаву копертку з уряднов печатков села (міста) а таксамо два листы на голосованя з белавыма пругами - еден лист на вольбы до заступительства самосправного краю а еден на вольбы председу самосправного краю. Потім волебна комісія закружкує чісло воліча в списку волічів на вольбы до органів самосправи села/міста/містьской части і выдасть волічови порожню білу копертку з уряднов печатков села (міста) і два білы листы на голосованя - еден на вольбы до самосправи села/міста/містьской части а еден на вольбы старосту села (пріматора міста).

**Перевзятя листів на голосованя і коперток потвердить воліч особітні в кождім списку волічів властноручным підписом.**

Каждый воліч мусить перед голосованём піти до шпеціального простору на управу листів на голосованя. Волічови, котрый не вступить до шпеціального простору на управу листів на голосованя волебна комісія села/міста/містьской части не уможнить голосовати.

**На листі на голосованя на вольбы до заступительства самосправного краю може воліч закружковати найвеце тілько кандидатів, кілько посланців мать быти зволених в прислушнім волебнім обводі (чісло посланців, котре ся волить у волебнім обводі є уведжене на листі на голосованя).**

**На листі на голосованя на вольбы председу самосправного краю може воліч закружковати лем єдного кандидата.**

В шпеціалнім просторі на управу листів на голосованя вложить воліч до белавой копертки лист на голосованя на вольбы до заступительства самосправного краю і лист на голосованя на вольбы председу самосправного краю.

**На листі на голосованя на вольбы посланців сельского (містьского) заступительства може воліч закружковати найвеце тілько кандидатів, кілько посланців мать быти зволених в прислушнім волебнім обводі (чісло посланців, котры ся волять у волебнім обводі є уведжене на листі на голосованя).**

**На листі на голосованя на вольбы старосту села (пріматора міста) може воліч закружковати лем єдного кандидата.**

В шпеціалнім просторі на управу листів на голосованя вложить воліч до білой копертки лист на голосованя на вольбы до сельского (містьского) засупительства і лист на голосованя на вольбы старосту села (пріматора міста).

**Кедь воліч вложить лист на голосованя до несправной копертки, такый лист на голосованя є н е п л а т н ы й.**

На пожадания воліча волебна комісія выдасть за несправні управлены листы на голосованя новы. Несправні управлены листы на голосованя воліч вложить до ладічки на одложія несхоснованих або несправні управлених листів на голосованя.

Воліч, котрый не годен сам управити лист на голосованя про своє здравотне зневыгодніня або зато, же не годен читати або писати і ознамить тот факт перед голосованём волебній комісії, мать право взяти із собов до простору на управу листів на голосованя іншу способну особу, абы подля ёго інштрукцій і закона управила лист на голосованя і вложила го до копертки. Обидві особы перед вступом до шпеціального простору на управу листів на голосованя член волебной комісії поучить о способі голосованя, о трестнім skutку змаріня приправы і перебігу волеб і о трестнім skutку волебной корупції. **Членове волебной комісії не сміють волічам управлєвати листы на голосованя.**

По одході з шпеціального простору на управу листів на голосованя воліч вложить белаву копертку до белавой ладічки на голосованя на вольбы до самосправных органів а білу копертку до білой ладічки на голосованя на вольбы до органів самосправи села/міста/містьской части.

**Кедь воліч вложить копертку до несправной ладічки на голосованя, таке голосованя є н е п л а т н е.**

Воліч, котрый не може про здравотне зневыгодніня сам вложити копертку до волебной ладічки, може пожадати, абы копертку до волебной ладічки в ёго притомности вложила інша особа, окрем члена волебной комісії села/міста/містьской части.

Воліч, котрый не може прийти до волебной містности із важных, главні здравотных доводів, мать право пожадати село/місто/містьску часть а в день волеб волебну комісію о реалізацію голосованя до переносной волебной ладічки, а то лем в територіалнім обводі волебного раёну села/міста/містьской части, подля міста свого стабільного биваня.

**Воліч повинен одложити несхоснованы або несправні управлены листы на голосованя до запечатованой ладічки на одкладованя несхоснованих або несправні управлених листів на голосованя, інакше ся допустить переступліня, за котре дістане покуту 33 Евра.**